


Los ntawm Thawj Tswj Hwm
Thomas S. Monson



Lub Txiaj Ntsim uas Yog Kev Hloov Siab Lees Txim

Thawj Tswj Hwm Thomas S. Monson tau qhia tias, “Peb txoj kev lav ris yog qhov uas peb yuav tsum muab peb txoj kev ua dog dig hloov kom txawj ua, hloov qhov uas peb ua tsis taus kom thiaj li ua taus. Peb lub luag hauj lwm yog kho peb tus kheej kom zoo tshaj. Vajtswv ib lub txiaj ntsim zoo tshaj plaws yog kev xyiv fab thaum peb rov qab sim ua dua, vim qhov uas peb ua tsis taus yeej tsis yog qhov kawg.”¹

Feem ntau peb xav tias peb yuav cuab hom phiaj thiab kho peb tus kheej thaum txog xyoo tshiab. Peb cog lus tias peb yuav hloov, ua zoo dua, thiab rov qab sim ua. Tej zaum txoj kev tseem ceeb tshaj plaws uas peb yuav rov qab sim ua yog qhov uas Thawj Tswj Hwm Monson hu ua “lub txiaj ntsim uas yog kev hloov siab lees txim.”²

Nyob hauv tej zaj lus los ntawm nws tej lus qhia txij thaum nws los ua tus Thawj Tswj Hwm ntawm lub Koom Txoos, Thawj Tswj Hwm Monson ntuas peb kom “muab Khetos cov ntshav theej txhoj xwv kom peb yuav tau txais txoj kev zam txim rau peb tej kev txhaum, thiab kom peb tej siab yuav dawb huv.”³

Txuj Ci Tseem Ceeb uas yog Kev Zam Txim

“Peb txhua tus twb xaiv ua yuam kev. Yog tias peb tseem tsis tau kho tej ntawd lawm, kuv cog lus rau nej tias muaj ib txoj kev rau nej kho tau. Kev txheej txheem no hu ua kev hloov siab lees txim. Kuv thov kom nej kho tej yam

uas nej tau ua yuam kev. Peb tus Cawm Seej twb tuag kom nej thiab kuv txais tau lub txiaj ntsim zoo no. Txawm yog txoj kev no tsis yooj yim, cov lus cog tseg no muaj tseeb tiag: ‘Txawm yog nej tej kev txhaum yauv liab cuag ntshav los kuv yuav ua kom dawb pawg li daus’ [Yaxayas 1:18]. Thiab tus Tswv yuav tsis nco ntsoov txog tej ntawd ntxiv lawm [Q&K 58:42]. Tsis txhob ua tej yam kom tso nej txoj sia nyob mus ib txhis tseg. Yog tias nej tau ua txhaum, yim sai nej rov qab los, yim sai nej yuav nrhiav tau kev kaj siab lug thiab kev xyiv fab uas los ntawm txuj ci tseem ceeb uas yog kev hloov siab lees txim.”⁴

Rov Qab Los txog txoj Kev Yog

“Txawm tias peb yuav tsum ua tib zoo xaiv, tseem muaj tej lub sij hawm thaum peb xaiv yuam kev. Lub txiaj ntsim ntawm kev hloov siab lees txim, uas peb tus Cawm Seej muab rau peb, cia peb kho peb txoj hau kev, xwv kom peb thiaj yuav rov qab mus taug txoj kev uas coj peb mus rau lub yeeb koob xilethi-aus uas peb xav tau.”⁵

Txoj Kev Rov Qab Los

“Yog nej leej twg ua yuam kev, kuv qhia rau nej tias muaj ib txoj kev rov qab los. Kev txheej txheem no hu ua kev hloov siab lees txim. Txawm txoj kev hloov siab lees txim yog ib txoj kev nyuaj, nej txoj kev cawm seej nyob mus ib txhis nyob ntawm seb nej puas ua. Puas muaj dab

tsi ntxiv uas tsim nyog nej ua? Kuv thov kom nej txiav txim siab tam sim no hais tias nej yuav ua txhua yam nej yuav tsum ua kom hloov siab lees txim tag nrho. Yim sai nej yim yuav muaj kev kaj siab lug thiab kev thaj yeeb zoo li Yaxayas hais [saib Yaxayas 1:18].”⁶

Tib Neeg Yeej Muaj Peev Xwm Hloov Siab

“Peb yuav tsum nco ntsoov tias tib neeg muaj peev xwm hloov siab. Lawv muab lawv tej cwj pwm tsis zoo tso tseg los tau. Lawv hloov siab lees txim rau lawv tej kev txhaum los tau. Lawv tsim nyog tuav lub pov thawj hwj los tau thiab. Thiab lawv rau siab pab ua tus Tswv txoj hauj lwm los tau thiab.”⁷

Rov Qab Hloov Los Ua Neeg Huv

“Yog tias muaj dab tsi tsis zoo hauv nej lub neej, yeej muaj ib txoj kev uas nej tawm tau. Tsum tsis txhob ua kev tsis ncaj ncees ntxiv. Nrog nej tus npisov tham. Muaj teeb meem dab tsi los nej yeej kho tau los ntawm kev hloov siab lees txim. Nej rov qab ua tau neeg huv dua.”⁸

Tus Cawm Seej lub Luag Hauj Lwm Tseem Ceeb

“Lub hauv paus rau txoj hau kev [cawm seej] no yog peb tus Cawm Seej, Yexus Khetos. Yog tsis muaj Nws txoj kev theej txhoj, ces txhua yam tsav yuav plam mus. Tiam sis, txoj kev ntseeg Nws thiab Nws tej hauj lwm, yeej yuav tsis txaus. Peb yuav tsum ua hauj lwm thiab kawm, tshawb nrhiav thiab thov Vajtswv, hloov siab lees txim thiab ua neeg zoo dua. Peb yuav tsum paub Vajtswv tej kev cai thiab ua raws li tej ntawd. Peb yuav tsum txais Nws tej kab ke uas cawm tau neeg. Tsuas yog thaum peb ua tej no peb thiaj yuav tau kev zoo siab tiag tiag, uas kav mus ib txhis.”⁹

LUS CIM

1. “The Will Within,” *Ensign*, Tsib Hlis Ntuj 1987, 68.
2. “Tej Kev Xaiv,” *Liahona*, Tsib Hlis Ntuj 2016, 86.
3. *Mauxiyas* 4:2.
4. “The Three Rs of Choice,” *Liahona*, Kaum Ib Hlis Ntuj 2010, 69.
5. “Tej Kev Xaiv,” 86.
6. “Coj Raws Li cov Lus Txib,” *Liahona*, Kaum Ib Hlis Ntuj 2015, 83.
7. “Saib Lwm Tus Raws Li Qhov uas Lawv Rais Tau Los Ua Neeg Zoo Li Cas,” *Liahona*, Kaum Ib Hlis Ntuj 2012, 68.
8. “Priesthood Power,” *Liahona*, Tsib Hlis Ntuj 2011, 67.
9. “Txoj Kev Taug Kev uas Zoo Tag Nrho Kom Tau Kev Zoo Siab,” *Liahona*, Kaum Ib Hlis Ntuj 2016, 80–81.

QHIA LOS NTAWM TSAB XOY NO

Peb txhua tus yeej tsis yog neeg zoo tag nrho—dhau los ntawm lub txiaj ntsim uas yog kev hloov siab lees

txim xwb uas muaj los ntawm Yexus Khetos txoj kev txi peb thiaj txais kev ntxuav peb tej kev txhaum mus thiab hloov peb lub neej kom zoo dua. Cia li xav seb puas xav sib tham nrog cov uas koj qhia txog qhov uas peb yuav ua li cas “kho peb txoj hau kev” thaum peb hloov siab lees txim. Lawv xav tias lawv nyob ze dua li Leej Txiv Saum Ntuj Ceeb Tsheej thiab Yexus Khetos thaum lawv hloov ua zoo nyob hauv lawv lub neej. Tej zaum koj caw tau cov uas koj qhia kom lawv sau ntawv txog lawv lub hom phiaj ntawm sab ntsuj plig rau xyoo tshiab thiab qhia ib tug phooj ywg, tus khub, los yog lwm tus hauv tsev neeg txog qhov uas lawv ua zoo li cas.

COV HLUAS

Cog Lus tias Yuav Hloov Siab Lees Txim

Thawj Tswj Hwm Monson piav tias “peb txoj kev lav ris yog qhov uas peb yuav tsum muab peb txoj kev ua dog dig hloov kom txawj ua, hloov qhov uas peb ua tsis taus kom thiaj li ua taus. Peb lub luag hauj lwm yog kho peb tus kheej kom zoo tshaj.” Ntau tus neeg siv lub Ib Hlis Ntuj kom cuab hom phiaj thiab cog lus tias yuav hloov los ua neeg zoo dua: luag ntxiv, noj zaub mov zoo ntxiv, los yog kawm ib qho txuj ci tshiab. Txawm yog tej lub hom phiaj no yuav pab yus hloov ua neeg zoo dua, txoj kev hloov zoo tshaj plaws yog los ntawm kev hloov siab lees txim.

Txawm yog kev hloov siab lees txim yog ib qho nyuaj los, kev hloov siab lees txim yog ib lub txiaj ntsim! Thaum peb tso siab rau Yexus Khetos thaum peb hloov siab lees txim rau peb tej kev txhaum, peb txawj hloov tau thiab vam meej. Thawj Tswj Hwm Monson hais tias “Lub hauv paus rau txoj hau kev [cawm seej] no yog peb tus Cawm Seej, Yexus Khetos. Yog tsis muaj Nws txoj kev theej txhoj, ces txhua yam tsav yuav plam mus.” Los ntawm kev hloov siab lees txim, koj txais tau kev ntxuav nej tej kev txhaum mus thiab yuav vam meej kom hloov los ua neeg zoo li Nws ntxiv.

Cia li xav txog ib yam uas ua rau koj tsis zoo li tus Cawm Seej. Puas yog tej lus uas koj hais? Puas yog tej yam uas koj ua rau koj cov phooj ywg los sis tsev neeg? Tom qab koj xav txog tej uas koj ua tau kom hloov los ua neeg zoo dua, cia li thov Leej Txiv Saum Ntuj Ceeb Tsheej thiab qhia Nws tias koj xav hloov siab. Cia li nco

ntsoov tias dhau los ntawm lub hwj chim ntawm Nws txoj Kev Theej Txhoj, Yexus Khetos pab tau koj kov yeej qhov uas koj ua yuam kev. Ib yam li Thawj Tswj Hwm Monson qhia tias, "Lub txiaj ntsim ntawm kev hloov siab lees txim, uas peb tus Cawm Seej muab rau peb, cia peb kho peb txoj hau kev."

Txawm yog tej lub hom phiaj thaum txog xyoo tshiab yuav pab peb ua tau zoo dua, txoj kev hloov zoo tshaj plaws yog los ntawm kev hloov siab lees txim.

Kuj saib "Eight Myths about Repentance" nyob ntawm lds.org/go/1186.

COV ME NYUAM

Kev Hloov Siab Lees Txim yog Ib lub Txiaj Ntsim

Lub txiaj ntsim uas yog kev hloov siab lees txim tsis yog ib lub txiaj ntsim uas yus pom tau los kov tau. Tiam sis, yog ib lub txiaj ntsim uas yus hnov tau. Qhov

no txhais hais tias, thaum peb xaiv ua yuam kev, peb hloov tau peb lub siab lees txim thiab rov qab nyob kaj siab lug thiab zoo siab dua.

Leej Txiv Saum Ntuj Ceeb Tsheej thiab Yexus yeej yuav pab peb hloov siab lees txim. Cia li teeb ib daim duab koom nrog txhua kauj ruam ntawm kev hloov siab lees txim.

Peb tu siab.

Peb thov Leej Txiv Saum Ntuj Ceeb Tsheej, qhia Nws tias peb tau ua dab tsi, thiab thov kom Nws pab peb xaiv zoo dua thaum yav tom ntej.

Peb thov txim thiab sim kho kom zoo.

Peb nyob kaj siab lug thiab paub tias peb tau txais kev zam txim.

© 2018 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub txhais ua lus Akiv: 6/17. Pub txhais ua lus Hmoob: 6/17. Kev txhais *First Presidency Message, January 2018*. Hmong 15045 295



Kev Ntseeg, Tsev Neeg,
Kev Pab

Lub Sij Hawm Twg, Nyob Qhov Twg, Siv txoj Kev Twg Los Cia Li Nrog Nws Sib Txuas Lus

Kev mus saib xyuas tom tsev yeej yog kev txhawb pab. Lub sij hawm twg thiab nyob qhov twg los Yexus yeej txhawb pab lwm tus. Peb ua tau zoo ib yam.

“Kev txhawb pab” yog kev pab los kev saib xyuas lwm tus uas pab nplij lawv lub siab los yog ua rau lwm tus zoo siab. Kev mus saib xyuas tom tsev yeej yog kev nrhiav tej yam uas peb ua tau kom txhawb pab cov uas peb mus xyuas. Yexus Khetos yeej txhawb pab txhua leej txhua tus—tsis hais lub sij hawm twg thiab nyob qhov twg los yog. Nws twb pub 5,000 leejnoj, nplij Maivliag thiab Mathas thaum nkawd tus nus tuag, thiab qhia Nws txoj moo zoo rau tus poj niam nyob ntawm lub qhov dej. Nws tau ua li no vim Nws hlub lawv tiag tiag.

Thaum ua raws li Nws tus yam ntxwv, peb cov uas mus saib xyuas tom tsev muaj peev xwm paub thiab hlub txhua tus viv ncaus uas peb mus xyuas, yog peb nco ntsoov tias kev hlub yog lub hauv paus ntawm txhua yam peb ua. Thaum peb thov Vajtswv kom txais kev tshoov siab paub pab nws thiab txhawb nqa nws txoj kev ntseeg, “yuav txwv tsis tau cov tim tswv los ua [peb] tus khub.”¹

Txij thaum tau txhim tsa lub Koom Haum Niam Tsev thaum xyoo 1842 txog niaj hnuv no, qhov uas cov poj niam txhawb pab lwm tus yeej tau foom koob hmoov rau lawv lub neej. Piv txwv hais tias, Joan Johnson, ib tug poj ntsuam uas muaj 82 xyoo, thiab nws tus khub mus saib xyuas tom tsev rau nkawd tus neeg zej zog uas muaj 89 xyoos thiab muaj kab mob ntsws. Nkawd pom tias tsis yog nkawd tus neeg zej zog xav tau nkawd ib hlis ib zaug xwb, yog li ntawd nkawd cia li pib mus xyuas nws txhua lub lim tiam mus rau nws lub tsev los yog hu xov tooj.

Rau lwm tus uas mus saib xyuas tom tsev, kev ntaus ntawv email los yog siv xov tooj ntawm tes kom txhawb nqa lawv tej zaum yog qhov zoo tshaj plaws rau ib tug viv ncaus lub hlis ntawd. Lub ntsiab ntawm kev mus saib xyuas tom tsev yog kev sib raug zoo thiab kev mloog lawv hais lus nrog kev hlub. Tej txuj ci technology uas muaj niaj hnuv no thiab kev mus saib xyuas lawv tim ntsej tim muag yeej pab tau peb ua

li no lub sij hawm twg, nyob qhov twg, thiab siv ntau txoj kev ua los tau. Ua li no yeej yog kev txhawb pab zoo li Yexus tau ua.

LUS CIM

1. *Teachings of Presidents of the Church: Joseph Smith* (2007), 454.
2. *Saib Handbook 2: Administering the Church* (2010), 9.5.1.

Xav Txog Qhov No

Peb yuav ua li cas kom txhob txhawj txog qhov uas tib neeg suav tias peb tau mus saib xyuas tom tsev thiab cia li tsom ntsoov txog qhov uas txhua tus viv ncaus xav tau dab tsi los ntawm nws ob tug saib xyuas tom tsev.

Kev Txhawb Pab

Txhua lub hlis phab no yuav tsis qhia txog ib zaj ntxiv, tiam sis yuav qhia txog ib lub ntsiab cai kom pab peb ib leeg txawj txhawb pab ib leeg. Thaum koj thov Vajtswv thiab nrhiav kev tshoov siab, koj yuav paub zaj lus txog sab ntsuj plig thiab txoj kev pab uas txhua tus viv ncaus xav tau.